

Morning Regional Dogri News Bulletin, 14th May 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. श्रीनगर संसदी हल्के च कल 37.99 फीसद मतदान होआ जेहड़ा पिछले केई दाहकें च सब्बने शा बद्ध ऐ। उपराज्यपाल मनोज सिन्हा होरें बड़े भारी मतदान आस्तै लोकें ते सरबंधत धड़ें गी मुबारकबाद दित्ती ऐ।
2. जम्मू दे डिवीजनल कमीशनर रमेश कुमार होरें 2024 दी श्री माता मचेल यात्रा दे प्रबंधें दा जायजा लैता ऐ।
3. कठुआ दे जिला विकास कमीशनर डॉ. राकेश मिन्हास होरें जिले च समग्र कृषि विकास कार्यक्रम दी अमलावरी दा जायजा लैता ऐ।
4. सांबा दे डिप्टी कमीशनर अभिषेक शर्मा होरें जिले च सैलसफा सविधाएं गी बढ़ावा देने आस्तै कार्य योजना पर सरबंध धड़ें कन्नै सोच बचार कीता ऐ।

<><><><><><>

Polling Srinagar

श्रीनगर लोकसभा हल्के च कल मतदान शांतिपूर्ण ढंगै कन्ने सम्पन्न होई गेआ। श्रीनगर, गांदरबल, पुलवामा, बडगाम ते शोपियां जिलें किश हिस्से पर आधारत इस संसदी हल्के च 37.99 फीसद मतदान होआ। 2 जहार 17 दे चुनाएं च इत्थें 14.43 फीसद मतदान दर्ज कीता गेआ ऐ। मुख चुनां अधिकारी पी.के.पोले होरें दस्सेआ ऐ जे इस बारी नां कोई बहिष्कार दी काल ही ते नां गै कुसै मतदान केन्द्र पर सिफर मतदान होआ, जित्थुं मता लगदा ऐ जे लोकें गी लोकतांत्रिक प्रणाली पर किन्ना भरोसा ऐ। उनें मतदान च बेह्तरी दा श्रेय सुरक्षा बवस्थाएं च होए दे सुधार, 24एं मेदवारें ते सियासी दलें दी प्रेरणा ते डिप्टी कमीशनरें ते सीईओ आस्सेआ चलाए गेदे जागरूकता अभियानें गी दित्ता।

<><><><><><>

LG-Sinha

उपराज्यपाल मनोज सिन्हा होरें श्रीनगर पार्लिमानी हल्के च कल होए दे बडे मते मतदान लेई लोकें ते सरबंधी घडे गी मुबारकबाद दिक्ती ऐ। सोशल मीडिया दी इक पोस्ट राएं उपराज्यपाल होरें आखेआ जे श्रीनगर संसदीय हल्के च बडा मता मतदान होआ ऐ ते एहदे राएं लोकें संविधान ते लोकतंत्र च अपने विश्वास गी प्रगट कीता ऐ। चुनां गी रमानदारी, शांतिपूर्ण, स्वतंत्र ते निपक्ख ढंगै सिर करोआने लेई उनें सब्बने सरबंधत घडे गी मुबारकबाद दिक्ती। उनें आखेआ जे लोकतंत्र दे सब्बने थमां बड्डे पर्व च मतदान दा एह प्रतिशत दिल बधाने आला ऐ।

<><><><><><>

UP-PM Nomination

भाजपा दे वरिष्ठ नेता ते प्रधानमंत्री नरेन्द्र मोदी होर अज्ज वाराणसी निर्वाचन क्षेत्र थमां नामांकन दाखल करगन। लोकसभा दी वाराणसी सीट आस्तै 7में ते खीरी गेड़ च वोट पाए जांगन। इस गेड़ लेई पर्वा भरने दा अज्ज खीरी दिन ऐ ते वोट 1 जून गी पाए जांगन। उत्तर प्रदेश दे मंत्री ते सांसद, इस मौके पर उत्थें मजूद रौंहगन। शुक्रवारें तोड़ी नां वापस लैने जाई सकदे न।

<><><><><><>

Div.Com Jammu

जम्मू दे डिवीजनल कमीशनर रमेश कुमार होरें कल इक बैठक लाइयै श्री मचेल माता यात्रा 2024 दी तैआरिएं दा जायजा लैता। बैठक दरान डिवीजनल कमीशनर होरें बक्ख-बक्ख मैहकमें जियां पीडब्ल्यूडी, प्रधानमंत्री ग्राम सड़क योजना, सेहत, जल शक्ति, पीडीडी, आपात सेवाएं ते होरने मुततलका मैहकमें दे कम्मकाज ते शुरू कीते गेदे जतनें दा जायजा लैता। इस दरान सरबंधी इंतजामें बारे व्यापक बचार बमर्श कीता गेआ। डिवीजनल कमीशनर होरें सरबंधी मैहकमें गी निर्देश जारी कीते जे ओ पैहले गै लोडचदे सारे बंदोबस्त पूरे करी लैन। उनें शिखड़क राबता, हैलीकाप्टर सेवा, मोबाइल राबता, यातायात प्रबंधन, सुरक्षा, बिजली, पानी ते सेहत सुविधाएं गी उपलब्ध करोआने लेई गलाया। उनें पर्यावरण स्हाबै संवेदनशील खित्ते च साफ सफाई बनाई रखने पर जोर दिक्ता। उनें डिप्टी कमीशनर होरें गी आखेआ जे ओह यात्रिएं लेई यात्री निवास गी शुरू करोआन ते यात्रिएं गी सारी सुविधा उपलब्ध करोआना जकीनी बनान।

<><><><><><>

DC-Kathua

कठुआ दे डिप्टी कमीशनर डॉ. रोश मिन्हास होरें कल इक बैठक च जिले च समग्र कृषि विकास प्रोग्राम दी अमलावरी ते प्रगति दा जायजा लैता। बैठक च मुख कृषि अधिकारी संजीव राय गुप्ता होरें इस स्कीम दी अमलावरी दी ताजा स्थिति दा लेखा जोखा पेश कीता। उनें थोम ते राजमा फसलें दी काशत दे बढ़ावे ते करसानें गी जड़ी-बुटिएं ते खुशबूदार बूहटे लाने आस्तै प्रोत्साहित करने दे हीलें पर लोह पाई। एहदे अलावा बाजरे, खुंबे, फुल्लें दी काशत ते तिलहनं दी काशत पर बी जोर पाया गेआ तां जे करसानें दी औंदन च बढ़ोतरी होइ सकै।

<><><><><><><><>

BBBP Ramban

रामबन दे डिप्टी कमीशनर नसीर उल हक चौधरी होरें कल बेटी बचोआ बेटी पढ़ाओ बारे जिला टास्क-फोर्स कमेटी दी बैठक लाइयै 2024-25 बरें दी कारवाई योजना पर सोच बचार कीता। सेहत मैहकमे पास्सेआ इस मौके पर नेकां गतिविधिएं दा सुझाह दित्ता गेआ। डिप्टी कमीशनर होरें सब्बनं मुत्तलका मैहकमे गी तालमेल बनाइयै कम्म करने दे निर्देश दित्ते ते पिछली योजनाएं दे नतीजें गी ध्यानै च रखियै अगली योजना तैआर करने लेई आखेआ। उनें आंगनवाड़ी केन्द्रें ते सरकारी प्राइमरी स्कूलें च कड़िएं दे पोषण आस्तै उपाह करने लेई बी आखेआ।

<><><><><><><><>

DC-Samba

सांबा दे डिप्टी कमीशनर अभिषेक शर्मा होरें कल डीसी दफ्तर च सरबंधी घड़ें कन्नै बैठक लाई। इस चर्चा दा मकसद सैलानी सुविधाएं ते साफ सफाई गी जिले च बधाना ऐ, खास करी मशहूर सैलानी थाहरें जियां चिची माता मंदर, श्री नरसिंग देव जी मंदर, बाबा सिद्ध गोरिया, बाबा चाम्लेयाल, सांबा किला ते महोरगढ़ किला च। डिप्टी कमीशनर होरें मकामी लोकें गी सैलसफा सरबंधी ढांचे च निवेश करने लेई प्रेरित करने आस्तै आखेआ तां जे इनें थाहरें औने आले सैलानिएं दी जरूरतें गी पूरा कीता जाई सकै। उनें इस गल्ला पर जोर दित्ता जे सांबा च धार्मिक ते होर दुए सैलसफा दी बड़ी मती समर्थ मजूद ऐ। इस आस्तै उनें जिला प्रशासन दी पूरी मदद दा बी भरसा दोआया। उनें मकामी लोकें गी होम स्टे आली सुविधा गी बढ़ावा देने लेई आखेआ। उनें आखेआ जे इस कम्मै गी जेकर बेहतर तरीके कन्नै कीता जा तां लोक एहदे थमां अपनी आजीविका बेहतर ढंगै सिर कमाई सकदे न। उनें आखेआ जे एहदे कन्नै जिले च सैलानी गतिविधिएं गी ते ग्रामीण अर्थबवस्था गी बढ़ावा थहोग।

<><><><><><><><>

Director Horticulture

बागवानी मैहकमे दे निदेशक चमन लाल शर्मा हुंदी अध्यक्षता च आमला जाति दी इक फसल सरबंधी करसान उत्पादक संगठन दे मिंबरें ते बोर्ड ऑफ डायरेक्टें कन्नै गल्लबात आले इक कार्यक्रम दा सरिस्ता कीता गेआ। इस कार्यक्रम दरान मकामी करसानूं दी खरी मती गिनतरी बी दिक्खी गई। इस कार्यक्रम राएं गल्लबात लेई इक मंच उपलब्ध करोआया ते राई-बाई कन्नै जुड़े दे समुदाय गी सशक्त करने दी वचनबद्धता दोहराई गई। इस मौके पर बोलदे होई निदेशक होरें एफपीओ दे महत्व पर लोह पाई। उनें करसानें गी सशक्त करने, सब्बने दे इस भेठा सांझे जतनें ते राई-बाई दे परिदृश्य च बदलाव पर जोर पाया। उनें लौहके करसानें गी संसाधनें तगर पुज्ज, बजारें ते जानकारी पजाने च एफपीओ दी भूमका गी उजागर कीता। उनें एफपीओ दे मिंबरें दे जतनें दी बी सराहना कीती। गल्लबात आले इस प्रोग्राम दरान ज्ञान दे आदान-प्रदान लेई इक मंच उपलब्ध होआ ते करसानें कन्नै इक जुटता जाहर करने दा बी मौका थहोआ।

<><><><><><>

Moungri Mela(byte)

अज्ज थमां शुरू होए दे 3 रोजा मौंगरी मेले च बड़ी मती गिनतरी च यात्रु सर-दब्बड़ पुज्जे करदे न। मेले दा उद्घाटन पंचैरी दे डीडीसी दे मिंबर जसवीर सिंह होर करै करदे न। भमाग पंचैरी, उधमपुर, चनैनी, रामनगर ते जम्मू थमां हर बरे बड़ी मती गिनतरी च श्रद्धालु शिव पार्वती दी पवित्र गुफा च मत्था टेकदे न ते मेले च शिरकत करदे न। होर जानकारी देआरदे न उधमपुर थमां साढ़े संवाददाता.....बाईट

<><><><><><>

Haj Pilgrims

पुंछ दे डिप्टी कमीशनर यासीन एम. चौधरी होरें कल पुंछ जिले थमां 42 हज यात्रिएं दा पैहला जत्थें गी रवाना कीता। इंदे च 31 मर्द ते 11 महिला यात्रु शामिल हियां। डिप्टी कमीशनर होरें हज पर जा'रदे अकीदतमंदें कन्नै गल्लबात कीती ते यात्रा दियां शुभकामनां दित्तियां। उनें दस्सेआ जे लोड़चदे सारे बंदोबस्त कीते गेदे न तां जे एह धार्मिक यात्रा रमानदारी कन्नै पूरी होई सकैफ। हज पर जा'रदे श्रद्धालुएं गी कुसै बी चाल्लील दी मदद लेई जिला प्रशासन कन्नै राबता करने लेई आखेआ गेआ ऐ।

<><><><><><>

Kishtwar Aspirants

जिला प्रशासन किश्तवाड़ आस्सेआ सिविल सेवा मतेयान देने दी इच्छा रखने आले ते सरकारी डिग्री कालेज दे विद्यार्थिं लेई “इक दिन डिप्टी कमीशनर हुंदे कन्नै” कार्यक्रम दा सरिस्ता कीता। इस दा मकसद विद्यार्थिं गी डिप्टी कमीशनर हुंदे कन्नै गल्ल करने, उंदे अनुभव जानने ते मतेयान दी तैआरी ते होर सरबंधी जानकारी उपलब्ध करोआने बारे ऐ। इस दरान इनें विद्यार्थिं गी इक मौका उपलब्ध होआ। वरिष्ठ अधिकारिं कन्नै गल्ल करने दा, प्रशासनिक कारवाइं गी दिक्खने ते डिप्टी कमीशनर हुंदी अध्यक्षता च होने आली बैठके च शामिल होने दा। डिप्टी कमीशनर होरे शोध करने पर जोर ते विद्यार्थिं गी आखेआ जे ओह समुदाये दी भलाई बेह्तरी सरबंधी पैहलकदमिं च हिस्सा लैन ते खास करी जिला किश्तवाड़ दी समृद्ध विरासत ते उत्थुआं दे छलैपे गी सांभियै रखने च अपना योगदान देन।

<><><><><><>